

## Simeoni ti Ana Yangalala Sambu Mesia Me Kwisa—Leso mosi ya Noel

### Luka 2 :21-38

**Moniteur NB:** Ata beto lenda sadila leso yai konso ntangu, yo kele mbote mingi kulonga yo na ntangu ya Noel, to kaka na nima ya Noel.

#### Kikuma ya Leso :

Na nsuka ya leso yai, bana ta bakisa nde bantu ya Nzambi fweti yangalala sambu Mesia me kwisa. Yo yina, bo ta yangalala na ntangu ya Noel na mpila ya ta pesa Nzambi kiese.

#### Verse ya Kulonguka :

*Nge ta mona kiese mingi sambu na Yandi, bantu mingi mpi ta mona kiese sambu na kubutuka na Yandi (Yesu).*

### Luka 1 :14

#### Bankunga :

[*Moniteur, bankunga yai ke monika ya mukanda ya MCE, « Bankunga ya Ecodim, Ed. 2018 ». Bana lenda yimba yonso ve na mposo mosi, ebuna kaka sola ndambu ya bana ke zaba, to sola mosi ya mpa kulonga bo. Kana nge longa bo nkunga ya mpa, yimba yo mbala na mbala na kati ya program ti leso ya ecodim, sambu bana kusimba yo mbote. Nge mpi lenda yimba bankunga ya nkaka ya ke tadila Noel to dibanza ya leso yai.*)

EMMANUEL

YANGALALA

MWANA NZAMBI MENE KUMA AWA

YANGALA, BANTU YONSO

NA MBETO YA NSUKAMI

ZITISA ZINA YA YESU

#### Malungi ya nene ya leso yai na bandambu 4 :

##### 1. Yozefi ti Maria nataka Yesu na Nzo-Nzambi sambu na kupesa Yandi na Nzambi na mpila ya Bazwif (Bayuda).

###### Kutanga : Luka 2 : 21-24

21 *Na nima ya mposo mosi, ntangu ya kuzenga mwana lungaka. Bo zengaka Yandi, ebuna bo pesaka Yandi zina : Yesu, zina yina ya wanzio songaka na Maria, ntangu yandi vandaka me baka divumu ntete ve.*

22 *ebuna ntangu ya kudikatula na bansiku lungaka, mutindu mikanda ya bansiku ya Moize ke tuba. Bo nataka mwana na Yeruzalemi sambu na kusonga Yandi na Mfumu Nzambi,*

23 *mutindu bo sonikaka na mikanda ya Bansiku ya Mfumu Nzambi nde : « Konso mwana-bakala yina me butuka yantete, bo fweti binga yandi mwana ya Mfumu Nzambi. »*

*24 Bo kwendaka mpi sambu na kupesa makabu yai, mutindu ke tuba Bansiku ya Mfumu Nzambi : bapizio zole ya fioti, to bana zole ya bapizio ya nene.*

**Kuyula bana :**

- Zina « Yesu », Yozefi ti Maria bakaka yo wapi?  
(Wanzio ya tubaka na Maria na ntwala yandi me baka divumu, wanzio yina pesaka yo.)
- Bansiku ya Moise pesaka na Bayuda, yo songaka bilumbu ya nkento fweti kinga na nima yandi me buta, ebuna na nima, yandi kuma na nzo-Nzambi. Na nima ya ntangu yina, bo nataka Yesu wapi?  
(Na Yeruzalemi)
- Bo zolaka kusala nki kuna?  
(Kusonga yandi na Mfumu Nzambi)
- Bayuda vandaka na nki nsiku sambu na mwana ya ntete ya bakala ?  
(Kupesa yandi na Nzambi)
- Bo kwendaka kupesa Mwana Yesu na Nzambi, ti kupesa nki ya nkaka ?  
(Nkailu ya bapizio. Yai vandaka nsiku sambu na bansukami ya vandaka ve na mpila kupesa mbisi ya nene.)

**Kusonga nki me salama :**

Bana sala theatre zole-zole. Na konso ndambu ya bana, mwana mosi ta sala bonso yandi kele Yozefi, mosi bonso yandi kele Maria. Bo lenda tula konso kima na diboko bonso yo kele Mwana Yezu. Bo simba mwana na diboko, bo tambula ti yandi na diboko bonso bo ke nata Yandi na nzo-Nzambi. Bo sala bonso bo ke simba mpi bapizio zole sambu na kupesa nkailu na Nzambi.

**Kuyimba ti kukina:**

Yozefi na Maria  
Bo nataka Yesu  
Na Nzo ya Nzambi.

**2. Simeon monaka mwana Yesu, ebuna yandi vandaka kuyangalala sambu Nzambi me kangula yandi nzila kumona Mesia.**

**Kutanga :** Luka 2 : 25-32

*25 Ebuna kuvandaka muntu mosi na Yeruzalemi, zina na yandi Simeoni. Yandi vandaka muntu mosi ya mbote ti ya kinzambi. Yandi vandaka kuvingila ntangu Nzambi ta katula mawa ya bantu ya Israele. Mpeve ya Nzambi vandaka na yandi.*

*26 Mpeve zabisaka yandi nde : « Nge ta fwa ve tii kuna nge ta mona Mesia yina ya Mfumu Nzambi me silaka. »*

27 *Mpeve ya Nzambi tindaka Simeoni na kwenda kukota na Nzo-Nzambi. Tata ti mama ya Mwana yina ya Bansiku vandaka kusonga.*

28 *Ebuna Simeoni bakaka mwana (Yesu) na maboko na yandi, yandi pesaka mersi na Nzambi, nde :*

29 « *Ntangu yai, Mfumu, mambu yina ya nge silaka mono me lunga ; Yo yina Nge lenda bikisa mono, muntu yina ke sadilaka Nge, sambu mono kufwa na ngemba.*

30 *Sambu mono me mona, na meso na mono mosi, Ngulusi.*

31 *Yina ya Nge me sola na meso ya bantu yonso.*

32 *Yandi kele mwini yina ta songa bamimpani nzila na nge. Yandi ta pesa lukumu na bantu na nge ya Israele. »*

**Kuyula bana :**

- Kuna na kati ya Yeruzalemi, Yozefi, Maria, ti Mwana Yesu, bo kutaka nani ?  
(Bakala zina ya Simeoni)
- Simeoni vandaka muntu ya nki mutindu ?  
(Muntu ya kinzambi ya vandaka kukinga Mesia)
- Nzambi me silaka Simeoni nki ?  
(Nzambi me sila nde yandi ta fwa ve na ntwala yandi me mona Mesia ya Nzambi silaka fweti kwisa.)
- Nani tindaka Simeoni na Nzo-Nzambi na ntangu ya fami ya Yesu vandaka kukwisa ti Yandi ?  
(Mpeve ya Nzambi tindaka Simeoni kuna.)
- Simeoni bakaka Mwana Yesu na diboko, ebuna yandi tubaka nki mutindu ?  
(Mersi na Nzambi sambu ntangu yai, yandi lenda kufwa na ngemba, sambu yandi me mona Mesia ya Nzambi silaka.)
- Simeoni tubaka nde Mwana Yesu Mesia ikele nki?  
(Mwini ya ta songa bamimpani nzila ya Nzambi)

**Kusonga nki me salama :**

Moniteur, nge sola ndonga mosi ya bana kusala bageste bonso mwana Yesu na fami na Yandi ke kwisa na nzo-Nzambi. Mwana mosi ya nkaka ta sala bageste bonso Simeoni. Simeoni songa kiese mingi kumona Mwana Yesu, sambu yandi me mona Mesia.

**Kuyimba ti kukina :**

Kiese na Papa Simeoni  
Kumona Yesu Mesia!

### 3. Simeon sakumunaka fami ya Yesu ti tubaka mambu ya ta kwisa na bo.

**Kutanga :** Luka 2 : 33-35

*33 Ebuna tata ti mama ya Yesu, bo vandaka kuyituka sambu na mambu yina ya Simeoni vandaka kutuba sambu na mwana na bo.*

*34 Simeoni sakumunaka bo. Yandi tubilaka Maria mama ya Yesu nde : « Nzambi me sola mwana yai sambu na kubwisa ti kutedimisa bantu mingi ya Israele. Nzambi me sola Yandi mpi sambu Yandi kuvanda kidimbu na Yandi yina ya bantu ta buyaka.*

*35 Mutindu yina, mabanza yina me bumbanaka na ntima ya bantu mingi, yo ta zabana. Ebuna nge mosi, mpasi ta tobula ntima na nge bonso mbele. »*

**Kuyula bana :**

- Simeoni sakumunaka banani ?  
(Bo yonso ya fami yina—Yozefi, Maria, ti Mwana Yesu)
- Simeoni songaka Mama Maria nde Yesu ta vanda kidimbu ya Nzambi, kansi bantu ta sala nki na yandi ?  
(Bantu ya buya Yandi.)
- Yandi songaka Maria mpi nde nki ta tobula ntima na yandi bonso mbele ?  
(Mpasi.)
- Bonso Maria vandaka mama ya Yesu, nki ntangu nge banza mpasi tobulaka ntima na yandi ?  
(Ntangu yandi monakaka Mwana na yandi na zulu ya kulunsi.)

**Kusonga nki me salama :**

Bana yonso sala bageste bonso bo kele Papa Simeoni ke sakumuna Mwana Yesu ti fami na Yandi.

**Kuyimba ti kukina:**

Papa Simeoni sakumunaka fami ya Mwana Yesu.

### 4. Anna tondaka Nzambi sambu Yandi me tinda Mesia.

**Kutanga :** Luka 2 : 36-39

*36 Kuvandaka mpi na nkento mosi, zina na yandi Ana mwana ya Fanuele, yandi vandaka profete ya Nzambi. Yandi vandaka na dikanda ya Asere. Yandi vandaka mununu ; yandi zingaka bamvula nsambwadi ti bakala na yandi ya makwela ;*

*37 ebuna, na nima ya lufwa ya bakala na yandi, yandi vandaka kuzinga kukonda bakala tii kuna yandi lungisaka bamvula makumi nana na iya. Yandi vandaka konso ntangu na Nzo-Nzambi. Kuna, yandi vandaka kusadila Nzambi mpimpa ti mwini. Mbala mingi*

*yandi vandaka kusamba Nzambi, yandi vandaka mpi kubuya kudia sambu na kusamba Yandi.*

*38 Na ntangu yo yina kaka, Ana kwisaka kukuma, ebuna yandi yantikaka kupesa mersi na Nzambi. Yandi vandaka kutuba mambu ya mwana yina na bantu yonso yina vandaka kuvingila nde Nzambi kugulusa bantu ya bwala Yeruzalemi.*

*39 Ntangu tata ti mama ya Yesu lungisaka mambu yina yonso mutindu Bansiku ya Mfumu Nzambi songaka, bo vutukaka ti Yesu na bwala na bo Nazareti, na ntoto ya Galilea.*

**Kuyula bana :**

- Nki nkento bo monaka na nzo-Nzambi?  
(Mununu Ana)
- Nki me vanda kisalu ya Ana na nima ya lufwa ya bakala na yandi?  
(Kusadila Nzambi kusamba na kati ya nzo-Nzambi)
- Mbala mingi Ana vandaka kubuya nki sambu na kusamba Nzambi?  
(Kubuya madia)
- Ntangu Ana monaka Mwana Yesu na fami na yandi, yandi salaka nki?  
(Kupesa mersi na Nzambi)
- Na nima ya mambu yai, fami ya Yesu vutukaka ti Yandi wapi?  
(Na bwala na bo Nazareti, na ntoto ya Galilea)

**Kusonga nki me salama :**

Bana yonso sala bonso bo kele nkento mununu Ana. Bo tambula na mpasi, etc. kukwisa. Ntangu bo mona Yesu na mama ti Yozefi, bo yonso yantika kuyangalala kutuba nde kiese sambu bo me mona Mesia.

**Kuyimba ti kukina :**

Mosi ya bankunga beto me sonika na luyantiku ya leso yai.

**Kumanisa Leso :**

Bantu yai Papa Simeoni ti Mama Ana, bo me zinga bamvula mingi kukinga Mesia ya Nzambi me sila nde, Yandi fweti kwisa. Ntangu bo monaka mwana Yesu, Nzambi kangulaka meso na bo kuzaba nswalu nde Mwana yai ya fioti vandaka Mesia yina. Bo vandaka na kiese mpila ve. Bo vandaka kaka kuyangalala sambu Nzambi me kangula bo nzila kumona Mesia na Yandi.

Beto mpi ya me zaba Yesu Kristo, beto ke na mfunu kuyangalala. Kukwisa na Yandi na ntoto yai kele mambu mosi ya kiese sambu na bantu ya kwikila Nzambi.

**Devoir sambu na Bakristo :**

Beno ya me yamba Yesu dezia na ntima na beno, beno bakristo, devoir mono ke pesa beno, yo yai: Na mposo ke kwisa kutula ngolo kuyangalala sambu na kukwisa ya Yesu Mesia na mpila ya ta pesa kiese na Mfumu Nzambi.

**Kubinga bo ya me yamba Yesu ntete ve:**

Awa lenda vanda mpi bana ya nkaka ya me yamba Yesu ntete ve. Mbala ya nkaka, nge bakisa ve nki yai zola tuba, “Kuyamba to kubalula ntima na Yesu.” Beto lenda tendula yo kuluta kana nge bikala na nima ya ecodim.

Mbala ya nkaka mpi nge bakisa yo ke tuba nki, kansi nge me zenga mambu yina ntete ve na ntima na nge.

Bubuyai kele ntangu mosi ya mbote kuzenga mambu yina. Beno ya me yamba Yesu ntete ve, kaka samba na ntima na nge yonso bonso yai:

*Tata Nzambi, mono me sala masumu na meso na Nge. Mono ke na mfunu ya Yesu kugulusa Mono. Mono ke lomba Nge kulolula masumu na mono. Mono ke tula ntima na Yesu sesepiyai. Mono ndima nde Yandi kele Mwana ya Nzambi me katuka na zulu, me fwa na zulu ya kulunsi sambu na mambi ya mono, me telama na zulu. Yesu, kota ntima ti luzingu na mono sesepiyai, ti kitula mono mukristo ya kieleka. Mono zola kulanda Nge.*

*Mersi sambu na pardo ya masumu na mono. Na zina ya Yesu, Amen!*

Kana nge me samba mpidina bubuyai, ata na bandinga mono me pesa, to ata na bandinga ya nge mosi, kana na ntima ya kieleka, Bible ke tuba nde nge me kuma mukristo. Yesu tubaka nde, “konso muntu ya kwisa na Mono, Mono ta buya yandi ve ata fioti” (Yoane 6:37b).

Kana nge me yamba Yesu bubuyai, yai mbala ya ntete ya nge kuyamba Yandi, kwisa na mono na nima ya ecodim, ti songa mono sambu mono lenda yangalala ti nge.

==NSUKA YA LESO==